

潭仔墘手記

黃勁連

阮滯兮房間有一个窗，拍開窗仔；風涼涼吹入來。阮定定踞店眠床墘研讀台語兮歌仔冊。阮兮窗仔向西，光線恰空氣攏足充足兮。

有東時，讀甲目珠澀澀，儂小可有一點仔忝；阮着 peh 起來行行咧，店房間內練跤花。

有東時，我會行出房間，來陽台看看咧。窗仔外，是一片曠闊兮世界。阮看着紅色兮厝瓦佇日頭中咧閃晰；厝頂尾，中脊有厝角鳥佇遐行來行去、飛來飛去；厝角鳥噉噉叫。我已經足久毋捌聽着厝角鳥兮叫聲，聽來誠歡喜，嘛足親切兮。阮讀師範兮時代，有讀着宋朝詞家周邦彥兮一首詞，詞那親像是安爾：「鳥雀呼晴侵曉窺檐語」，是描寫即款兮景色兮。

佇台北流浪兮日子，看着兮攏是電火柱、電線，青色兮燈火照着冷落兮街路；罕得幾時，有機會來聽鳥仔啼叫。若有兮，是車聲叭叭叫；聽着會起雞母皮。

一間厝接一間厝，厝瓦閃光。田庄兮西片，是甘蔗園、是番麥園，遠遠一片青 phiàng-phiàng、烏 sim-sim。一坵一坵兮田園肖接、一坵一坵肖照顧。天氣誠好，我有看着燕仔佇半天頂飛來飛去。

遠遠，我侻看着西北片兮竹抱〈竹模〉跤。即款兮天氣，有一寡風咧透，我想竹抱跤，一定足清涼兮。田庄兮朋友，一定佇遐咧歇困、納涼。無的確有儂佇遐喝酒拳、淋燒酒嘛無一定。

轉來草地兮感覺真好。空氣恰日頭光充足；到處有綠色通看，目珠若疲勞，看田園兮綠色，着會當消除；毋免點目藥水。

轉來故鄉兮感覺誠好。我心內安爾講。佇即个軟紅十丈兮風塵，即个喊喝兮世界，有一个故鄉真正好。伊毋是溫泉鄉，伊是阮心靈兮故鄉。伊毋是甚乜大都市、大所在；但佇阮兮心目中，伊永遠是上蓋水兮。